

# АКАФИСТ СВЯТЫМ БЛАГОВЕРНЫМ КНЯЗЮ ПЕТРУ И КНЯГИНЕ ФЕВРОНИИ, МУРОМСКИМ

## Кондак 1

Избранныи чудотворцы и велицыи угодницы Господни, града Мурома заступницы и приснии о душах наших молитвенницы, святии благовернии княже Петре и княгине Февроние! Пение похвальное вам приносяще, молим вы усердно: яко имущии дерзновение ко Господу, предстательством вашим от всяких бед нас свободите, и наследники Царствия Небеснаго нас соделайте, да зовем вам радостно: Радуйтесь, святии и преславнии чудотворцы Петре и Февроние.

## Икос 1

Ангели земнии и человецы небеснии воистинну явистесь, блаженнии Петре и Февроние, от юности вашае чистую совесть имущии к Богу, и добре во благочестии и чистоте вкупе пожившии, нам же оставльшии в пример подражания житие ваше богоугодное, емуже чудящесь и чудеса вашими озаряеми, зовем вам гласы хвалебными сице: Радуйтесь, от юности вашае Христа возлюбившии и Тому от души поработавшии; радуйтесь, целомудрия хранители и душевныя и телесныя чистоты рачители. Радуйтесь, души ваша и телеса на земли в обиталище Духа Святаго уготовившии; радуйтесь, исполненнии премудрости и разума божественнаго. Радуйтесь, яко во плоти, яко безплотни, вкупе пожисте; радуйтесь, яко равноангельную честь достойне приясте. Радуйтесь, яко от земли на Небо преидосте и тамо со Ангелы Троице предстоите; радуйтесь, яко со безплотными лики трисвятую песнь Ей воспеваеете. Радуйтесь, на Небеси и на земли от Господа прославленнии; радуйтесь, обретшии вечное всесветлое место упокоения. Радуйтесь, града Мурома сокровища пребогатая; радуйтесь, источники неистощимии чудес. Радуйтесь, святии и преславнии чудотворцы Петре и Февроние.

## Кондак 2

Видев князь Петр в возвратной болезни своей, знамение гнева Божия, за неисполнение обета своего, пояти в супруги себе премудрую Февронию, потщася сие исполнити и сочетася с нею браком законным, Обаче и в супружестве целомудренно и богоугодно пожисте, блаженнии, имуще едину мысль во двою телу, еже благоугождати Богу; темже выну поете Ему ныне со Ангелы песнь: Аллилуиа.

## Икос 2

Разумом богопросвещенным свыше одареннии, Петре и Февроние святии, любовь и милосердие к бедным и сирым явисте, обидимым и беспомощным за-

ступницы бысте, и иными добродетельми многими украсисте княжение свое земное. Сего ради вопием к вам сице: Радуйтесь, блаженнии и треблаженнии, в боголюбии пожившии и благоверие сохраниши; радуйтесь, милости и сострадания преисполненнии. Радуйтесь, беспомощных скории помощницы; радуйтесь, печальных блазии утешители. Радуйтесь, сирот и вдовиц кормители; радуйтесь, сущих в бедах предстатели. Радуйтесь, болезней душевных и телесных искуснии целители; радуйтесь, скорбных сердец радостотворнии посетители. Радуйтесь, любовь вашу к Богу, любовьию к ближним своим показавшии; радуйтесь, княжение ваше земное праведно и богоугодно содержавшии. Радуйтесь, князей православных похвало и града Муром утверждение; радуйтесь, всея земли Российской заступление. Радуйтесь, святии и преславнии чудотворцы Петре и Февроние.

### **Кондак 3**

Силою благодати Божия укрепляемь, блаженне княже Петре, восхотел еси паче оставити град отечества твоего и княжение Муромское, неже бракоразвестися с премудрою Феврониею по настоянию гордых боляр твоих. Сего ради Бог тя прослави и сотвори, да темиже боляры возвращенный вкупе с супружницею твоею, на престоле княжения Муромскаго паки утвердился еси, нам же пример хранения закона Божия показуеши подвигом твоим, да подражающе тебе в святости хранения союза брачнаго, воспеваем подвигоположнику Христу: Аллилуиа.

### **Икос 3**

Имуще попечение о людех своих, преблаженнии Петре и Февроние, несусьно подвизастесь ко благу их, благочестие насаждая, нечестие искореняя и вражду умиротворяя. Темже и Господь, видя таковыя подвиги ваша, землю Муромскую плодоносием благослови и мир глубок княжению вашему дарова, подвизая люди ваша благодарственно воспевати вам сице: Радуйтесь, угодницы Божии, житию великих святых сопричастницы; радуйтесь, правителие предобрии, люди муромския ко спасению путеводившии. Радуйтесь, христианскаго благочестия блюстители; радуйтесь, нестроения, раздоров и всякаго нечестия искоренители. Радуйтесь, супругов христиан ко благочестному житию наставницы; радуйтесь, целомудрия и воздержания супружеская образи преизящнии. Радуйтесь, праведнаго суда рачители; радуйтесь, немздоимства и безкорыстия ревнители. Радуйтесь, святых царей Константина и Елены добродетелей стяжатели; радуйтесь, равноапостольнаго князя Владимира и блаженныя княгини Ольги достойнии преемницы. Радуйтесь, двоице пречестная и благое сочетание, лучами чудес немерцаемо сияющии; радуйтесь, отечества вашего пресветлии светильницы. Радуйтесь, святии и преславнии чудотворцы Петре и Февроние.

### **Кондак 4**

Буря скорбей и напастей, воздвигаемая злобою мира сего, не ослаби крепкую любовь вашу яже к Богу, Петре и Февроние блаженнии, но паче научи вас

благоискусно отражати разжженные стрелы искушений диавольских: вы бо оболкшесь в броню веры Христовы, в мире глубоче преидосте многмятежную пучину житейскаго моря, и достигосте в тихую пристань спасения, к нейже и нас молитвами вашими приведите, да в купе с вами поем Богу: Аллилуиа.

#### **Икос 4**

Слышавше ближнии и дальнии благочестное житие ваше, благовернии Петре и Февроние, прославляху человеколюбца Бога, даровавшего вам крепость на вся дела благая, имиже яко лучами пресветлыми, просияете в отечестве вашем, идеже и донныне имена ваша честны, и подвиги ваша воспеваются похвалами сими: Радуйтесь, двоице пресветлая, Богом совокупленная; радуйтесь, светом благочестнаго жития вашего, яко светила богосветлая, просиявшии. Радуйтесь, милостынею и молитвами Небесное Царствие стяжавшии; радуйтесь, смирением и пощением вечное блаженство улучившии. Радуйтесь, яко мзда ваша многа на Небесех есть; радуйтесь, яко радость ваша вечна во светлостех святых. Радуйтесь, раби Христовы возлюбленнии; радуйтесь, святых всех приснии друзи. Радуйтесь, звезды непрелестнии, путь супружескаго жития богоугоднаго верно указующии; радуйтесь, облацы росоноснии, зной страстей и нечестия прогоняющии. Радуйтесь, Божиих милостей и щедрот нам податели; радуйтесь, отечества вашего украшение не отъемлемое. Радуйтесь, святии и преславнии чудотворцы Петре и Февроние.

#### **Кондак 5**

Богоспросвещеннии светильницы благочестия и предивнии чудотворцы Петре и Февроние, Бога от всея души возлюбивше, вся заповеди Его сохранисте; темже и Христос, яко солнце и луну пресветлая, показа вас, преблаженнии, чудес многих зарею озаряющия область Муромскую и всю страну Российскую, прославив нетлением святых и многоцелебных мощи ваша, к нимже припадающе, по достоянию ублажаем вас и выну благодарственно поем дивному во святых Своих Богу: Аллилуиа.

#### **Икос 5**

Видевше житие ваше праведное и щедроты ваша, людие муромстии славляху нас, своих правителей милостивых, благовернии Петре и Февроние, вы же смирение истинное возлюбивше и похвалы человеческия небрегше, гордынею неузвлени пребысте, и тем покажете нам образ вышшаго смирения, емуже поучаяся, с любовью вопием вам таковая: Радуйтесь, славу человеку ни во что же вменившии; радуйтесь, смирение Христово усердно возлюбившии. Радуйтесь, заповедей Господних вернии исполнители; радуйтесь, учения Евангельскаго истиннии последователи. Радуйтесь, раби Бога Вышняго, волю Его сотворшии; радуйтесь, веру Христову до конца соблюдшии. Радуйтесь, христоименитым людем благочестия учителя; радуйтесь, хотящих богоугодно жити богомудрии наставницы. Радуйтесь, молитвами вашими спасающии нас от всяких бед; радуйтесь, вся благая прошения наша исполняющии. Радуйтесь, в недужех страж-

душих благодатнии врачеве; радуйтесь, милостивии страны Муромския покровителие. Радуйтесь, святии и преславнии чудотворцы Петре и Февроние.

### **Кондак 6**

Проповедницы веры православныя и ревнители благочестия не словом токмо, но всем житием своим бысте во граде Муроме, прехвальнии Петре и Февроние; темже и святая Церковь достойне почитает подвиги и труды ваша, имиже трудистесь во славу Бога Вышняго, немолчно воспевая Ему: Аллилуиа.

### **Икос 6**

Возсиясте во граде Муроме светом добродетельнаго жития вашего, яко звезды богосветлыя, преблаженнии Петре и Февроние, и память ваша в нем с похвалами до днесь, яко и по смерти своей не престаете озаряти нас, многая чудеса совершающе, и теми светлую зарю бессмертия нам от мощей ваших возсиявающе, да ублажаем вас благохвалениями сицевыми: Радуйтесь, чина и уставов святых Церкви вернии хранители; радуйтесь, служителей олтаря Господня благоговейнии почитатели. Радуйтесь, благих обычаев и преданий святоотеческих ревнители; радуйтесь, обычаев злых и суемудрий языческих искоренители. Радуйтесь, суды нелицеприятны людем вашим творившии; радуйтесь, суды ваша с милостию соединившии. Радуйтесь, кротцыи и незлобивии последователи Христовы; радуйтесь, злобу добром препобеждавшии. Радуйтесь, нетления благоухающии цветы; радуйтесь, бессмертия немерцающии лучи. Радуйтесь, на земли величием чудес блистающии; радуйтесь, на Небеси со Ангелы Бога славыи. Радуйтесь, святии и преславнии чудотворцы Петре и Февроние.

### **Кондак 7**

Хотяй человеколюбец Господь явити в житии вашем, Петре и Февроние, образ назидания не токмо людем мирским, но и ликом иноческим, внуши вам в старости маститей оставити славу княжения земнаго, и восприятити образ иноческий, в немже подвизаетесь добре постом, бдением и молитвою, воспевающе непрестанно Троединому Богу ангельскую песнь: Аллилуиа.

### **Икос 7**

Новую благодать Божию во иночестем пострижении приемше, преподобнии, новыми подвигами украсисте равноангельное житие ваше и тако сугуб плод совершенства духовнаго Христу принесосте, и мзду преподобных достойне от Него восприясте. Поминая убо таковую ревность вашу к подвигом духовным, прославляем вас сими достождными похвалы: Радуйтесь, яко любви ради Господа, мира сего княжение и славу остависте; радуйтесь, яко иноческое равноангельное житие усердно восприясте. Радуйтесь, совершеннаго терпения подвижницы; радуйтесь, вольныя нищеты блаженнии стяжатели. Радуйтесь, прежде кончины вашаея вся страсти умертвившии воздержанием; радуйтесь, восприявшии святую схиму в броню спасения. Радуйтесь, багряницу княжескую

на власяницу иноческую пременивши; радуйтесь, постом, бдением и непрестанными молитвами Богу добре угодивши. Радуйтесь, боголюбезнаго уединения взыскатели; радуйтесь, спасительнаго безмолвия любители. Радуйтесь, слезами молитвенными орошаеми; радуйтесь, в сонме преподобных на Небеси прославлении. Радуйтесь, святии и преславнии чудотворцы Петре и Февроние.

### **Кондак 8**

Странное и дивное бе чудо, егда ты, блаженне Петре, на кончине живота твоего, прошения ради супружницы твоея, святыя Февронии, исходом своим умедлил еси, дондеже сконча она пелену церковную, ею сшиваему и вкупе с тобою к исходу смертному приспе, и тако неразлучнии в житии, неразлучнии в кончине явистеся, и во един день и час святыя души своя в руке Божии предасте, зовуще присно живыми и мертвыми обладающему Владыце Богу: Аллилуиа.

### **Икос 8**

Вси чудяхуся и славляху дивнаго во святых Своих Бога, егда святыя ваша телеса, в разных гробех положенная, чудесно обретошася лежаща в общей гробнице, юже уготовасте себе, преподобнии, в соборней церкви града Мурома, идеже и донныне неразлучно почиваете, чудотворцы святии, неоскудныя источающе исцеления всем, с верою прибегающим к вам и зовущим: Радуйтесь, союз любви вашей до гроба и за гробом верно сохраниши; радуйтесь, не токмо в жизни, но и по смерти, о Господе соединении. Радуйтесь, в супружестем благочестнем житии вам подражающим крепцыи помощницы; радуйтесь, теплотою любви вашей и нас согревающии. Радуйтесь, смертью временною прешедшии к жизни вечней; радуйтесь, от Господа нетлением и чудесы прославлении. Радуйтесь, яко память ваша с похвалами и успение со святыми; радуйтесь, яко имена ваша честна суть и благословенна в отечестве вашем. Радуйтесь, Российския страны удобрение благодатное; радуйтесь, града Мурома ограждение несокрушимое. Радуйтесь, о любящих и чтущих вас небеснии предстатели; радуйтесь, приснопросящии нам у Господа дары благодати Его. Радуйтесь, святии и преславнии чудотворцы Петре и Февроние.

### **Кондак 9**

Вси Ангели и святых лики радовахуся радостию велию, егда святыя души ваша достигоша вечнаго в обителях райских селения, и Сам Творец Ангелов и Святейший святых Царь Славы Христос, безсмертия венцы увенча вас и дарова вам благодать молиться Ему со дерзновением многим о всех ищущих вашего заступления, егоже не лишите и нас грешных, Петре и Февроние достохвальнии, смиренно-мудренно воспевающих прославльшему вас Богу хвалебную песнь: Аллилуиа.

### **Икос 9**

Ветийство человеческое не довлеет к достойному прославлению дивнаго жития вашего, святии чудотворцы Петре и Февроние; кто бо исповесть вся моления и пощения, болезни и труды ваша? кто изочтет вся слезы и воздыхания ваша яже к Богу? Обаче мы любовию к вам подвигаеми, дерзаем воспевати вам сия малыя и нехитростныя похвалы: Радуйтесь, благодати Святаго Духа избраннии сосуди; радуйтесь, радости нам вечныя благоприятнии ходатаи. Радуйтесь, богобоязненных супругов в благочестии утверждение; нарушителей супружескаго целомудрия и согласия грозное обличение. Радуйтесь, гнев Божий, праведно движимый на нас, молитвами вашими утоляющий; радуйтесь, о мире всего мира непрестанно Господа умоляющий. Радуйтесь, на враги видимыя и невидимыя крепцыи нам споборницы; радуйтесь, ангелонравнии человецы. Радуйтесь, преподобных и праведных сонаследницы; радуйтесь, Пресвятыя Троицы вернии угодницы. Радуйтесь, блаженнии обитатели горняго града Иерусалима Небеснаго; радуйтесь, со святыми торжествующии в скиниях райских. Радуйтесь, святии и преславнии чудотворцы Петре и Февроние.

### **Кондак 10**

Спасение вечное унаследовавше богоблаженнии Петре и Февроние, душами вашими в обителях горних неразлучно в Бозе пребываете, святыми же мощами вашими в храме Божиим нетленно вкупе почиваете, и обильныя исцеления источаете, да чудесы вашими благодатно озаряеми, хвалебно взываем Верховному Творцу чудес Богу: Аллилуиа.

### **Икос 10**

Стену заступления, благоприятныя молитвы ваша к Богу, обретше, святии чудотворцы Петре и Февроние, благодарение Отцу Небесному усердно возсылаем за вся благодеяния Его, вами всем нам обильно являемая, вам же, представителям нашим, сицевое приносим пение: Радуйтесь, всесветлаго Царствия Христова наследницы; радуйтесь, ангельских ликов собеседницы. Радуйтесь, Бога во славе неприступней созерцающей; радуйтесь, Трисияннаго Божества таинницы. Радуйтесь, со святыми на Небеси вечно царствующии; радуйтесь, от горних высот к земнородным милостивно приникающей. Радуйтесь, крини благоуханнии небеснаго прозябения; радуйтесь, кипариси чудоточнии рая Иисусова. Радуйтесь, податели независтнии безмезднаго врачевания; радуйтесь, совершители достохвальнии многих чудес. Радуйтесь, благодеяний множество нам источающей; радуйтесь, милостию сострадания вашего всех объемлющей. Радуйтесь, святии и преславнии чудотворцы Петре и Февроние.

### **Кондак 11**

Пение молебное приносим вам, угодницы Божии Петре и Февроние, и с любовию припадаем к раце святых и многоцелебных мощей ваших, прославляя житие ваше богоугодное и подвиги многи. Молимся вам усердно, чудотворцы

святии, помозите нам подражати вашим добродетелем, да возможем богоугодно пети Создателю нашему: Аллилуиа.

### *Икос 11*

Света небеснаго исполнен бе соборный храм града Мурома, егда благоволением Божиим святыя мощи ваша Петре и Февроние, целы и благоуханны обретошася в нем, и из недр земных, яко сокровище драгоценное, изнесены быша, идеже и до ныне почивают, исцеления неоскудные источающе недужным и болящим. Сего ради песненно вопием к вам: Радуйтесь, злато нетленное, в недрах земных обретенное; радуйтесь, бисери сияющие и благодатно просвещающие человек. Радуйтесь, святыя Православныя Церкви похвало; радуйтесь, ересей и расколов обличение. Радуйтесь, свети умнии, зарю Святаго Духа облистующии; радуйтесь, мира благоухания Христова преисполненнии. Радуйтесь, облеченнии в ризу в благодатного нетления; радуйтесь, препоясанныи силою многих чудес. Радуйтесь, яко рака ваша честная врачевница явися недугом человеческим; радуйтесь, яко от нея всяк с верою приходяй дары целебныя приемлет. Радуйтесь, светлостию чудес ваших мрак душ наших озаряющие; радуйтесь, нетлением святых мощей ваших зарю общаго всех воскресения нам показующии. Радуйтесь, святии и преславнии чудотворцы Петре и Февроние.

### *Кондак 12*

Благодать свыше вам дарованную, познавше, святии чудотворцы Петре и Февроние, с благоговением и любовию покланяемся нетленным и многоцелебным мощем вашим и от них приемлем в недужех исцеление, в скорбех утешение, в бедах благодатную помощь: темже и прославляем вас по достоянию, небесных предстателей и заступников наших, воспевающе хвалы и благодарения вами благодворящему нам Владыце Богу: Аллилуиа.

### *Икос 12*

Поюще многая и преславная ваша чудеса, величьи угодницы Божии Петре и Февроние, ублажаем вас, яко целителей, утешителей и помощников от Господа нам дарованных, и молитвенно торжествуем святую память вашу, от любве сердечныя воспевающе вам благодарственно и хвалебно: Радуйтесь, во благоухании святыни нетленно почивающие; радуйтесь, с верою приходящих к раце мощей ваших благодатно освящающие. Радуйтесь, призывающих молитвенно честная имена ваша скории услышатели; радуйтесь, упование на вас по Бозе возлагающих дивнии помощницы. Радуйтесь, известнии умилоствители Царя Небеснаго; радуйтесь, сильнии защитницы наши от врагов невидимых. Радуйтесь, приснии всем нам ходатаи спасения; радуйтесь, неотступнии хранители града Мурома. Радуйтесь, князей российских пречудная доброто; радуйтесь, отечества вашего Богом дарованныи покровители. Радуйтесь, телес наших благодатнии целебницы; радуйтесь, о душах наших усерднии ко Господу молитвенницы. Радуйтесь, святии и преславнии чудотворцы Петре и Февроние.

### **Кондак 13**

О святити и преславнии чудотворцы, благовернии княже Петре и княгине Февроние! Приимите милостивно сие похвальное пение от нас недостойных во умилении вам приносимое, и вашим предстательством у Господа испросите нам утверждение в вере и добрых делех, и избавление от всех скорбей и болезней временных и вечных, да сподобимся вкупе с вами и всеми святыми во Царствии Небеснем пети Пресвятей Троице вечно хвалебную песнь: Аллилуиа.

**(Этот кондак читается трижды, затем икос 1 и кондак 1)**